

四庫全書

史部

欽定四庫全書

歷代名臣奏議卷三百三十

明 楊士奇等 撰

禦邊

宋神宗熙寧三年十一月司馬光乞留諸州屯兵劄子
曰臣奉勅充永興軍一路兵馬都總管安撫使臣竊聞
本路十州所管屯駐禁軍至少大率皆是緣邊就糧兵
士常時分為上下番有一半在逐州或遇邊上稍有警

急則盡皆抽去逐州並無守把兵士臣竊惟天下事不可忽必須思患豫防敵人犯邊雖當竭力捍禦然腹內州軍豈可全無武備況逐州皆有軍資甲仗市邑民居萬一戎馬奔突間諜內應或盜賊乘虛姦人竊發其本州官吏手下無兵雖有智勇將安所施臣愚以為逐州宜各添一指揮禁軍屯駐內永興軍為關中根本宜添兩指揮若朝廷別無兵士可以差撥只乞於緣邊就糧兵士內依此數目撥留在逐州屯駐邊上更不得勾抽

所貴緩急不至失脩取進止

四年樞密使文彥博論進築河州奏曰臣竊聞議論欲至來春進築河州漸恢遠略臣竊思之以為未可蓋熙州初成猶未全固西蕃內附尚要撫綏積粟未豐屯兵雖衆未宜多事恐累成功臣以謂且須增固熙州使有保民之利安存蕃部彌堅向漢之心倉廩豐盈士馬壯健以守則固以戰則強根本既堅枝葉自茂然後洮河之役以指顧而就今欲務速臣切深憂古人謂欲速則

不達見小利則大事不成又云勞於服遠不若修近斯
言可鑒在理必然夫趣時希旨人之甚利犯顏違意人
之甚害中人之情鮮不為利多是顧身謀而諂說豈肯
為國而危言臣待罪之所地兼將相若括囊無言仰屋
竊歎祖宗之獎擢負陛下之倚任是敢因事極論違
衆立議庶幾萬一有補涓毫陛下以臣為納忠報國幸
賜採擇以臣為害成沮事甘俟誅夷臣無任惶恐隕越
之至

元豐五年彥博判河南上奏曰臣去歲冬輒率愚瞽累奏陳陝西邊事今春蒙差臣男貽慶特賜臣二月二十五日手詔撫諭後蒙聖慈矜寬不責狂易恭讀詔旨曰六軍還塞將士已殫勞黎民已告病今日之勢豈復可遠舉深入哉惟固境自完而已近命涇原制置城數亭障制敵衝軼非有前日圖也臣仰味聖言伏增欣忭有以見陛下推堯舜之心卹生靈之困罄茲溥率廣被涵育幸甚幸甚然自今秋已來復有遣戍開疆運糧深入

此必是邊臣希功規為僥倖開陳端緒誑惑朝廷料敵不精致有撓敗進此計者陛下必知其人乞行顯誅以戒今後干賞蹈利之輩免致向去更誤朝廷大事望以今年二月二十五日詔書大旨密諭邊臣嚴設備預固境自完來則禦之去勿遠逐更年歲間士氣復振民力復完足食足兵何求不可醜羌聞之自當屈服臣又聞謀攻料敵老將所難不當與新進白面書生惟務高談虛論容易而計畫之今以天下之大士人之衆豈無深

識遠慮懷忠守正更事歷試之人願陛下詳求而審用之如祖宗朝所用捍邊守塞宿將名臣見於國史者多矣乞詳察之臣之此言非不知觸犯時怒蓋耄耄之年被三朝重任蒙陛下眷獎尤深乃心本朝義均休戚豈當隨例緘默上負聖明伏望天慈亮其區區竭盡之誠熙寧八年四月樞密副使富弼答詔問非邊事宜上疏曰臣素乏才業忝塵二府昔在壯時精力尚不及人今老且病氣志衰耗何足脩大政之問然臣實非已見今

但舉衆人所得聞者錄以上奏惟聖明裁擇臣五六年來切聞綏州囉亢熙河辰錦戎瀘交趾咸議用兵唯交趾中寢其餘諸路皆有攻討或剋獲或喪失即傳播天下而綏州囉亢熙河始初興舉便傳聞云朝廷必復靈夏平賀蘭既又大傳有人上平燕之策此說尤盛北敵必已探知相繼彼復聞朝廷修整器甲簡練兵伍增築城壘積聚芻糧加之招致高麗為牽制之援近又分置河北三十六將按閱愈急宣布漸久事機參合此敵人

所以先期啓釁以發代北侵境之端而不肯已也其平
賀蘭平燕之策虛實固不可知然傳者既多且久萬口
一詞誰敢辯白設有辯者遠裔何以取信今釁端已成
代北各屯兵馬境上爭議逾年未決橫使再至事歸朝
廷此邊臣之職而朝廷自當之則恐理難欸緩便要可
否違之則兵立起而患速順之則河東斥堠窄狹為患
雖遲而久遠不便臣謂不若一委邊臣令其堅持久來
圖籍疆界為據使其盡力交相詰難然北敵非不自知

理曲蓋故欲生事遂興干戈以氣吞我以勢陵我是欲奪我累年所作之事彼非敢無故驟興此端實有以致其來也惟陛下深省熟慮不可獨謂敵人結釁背盟也彼若萬一入寇事不得已我持嚴兵以待之來則禦戰去則脩守此自古中國防邊之要也若朝廷乘忿便欲深入討擊臣實慮萬一差跌其害非細更或與西夏爲犄角之勢則朝廷宵旰矣事既至此邊奏警急兵糧皆缺窘於應用須防四方凶徒必有觀望者謂國家方事

外虞其力不能制我遂相嘯聚蜂蝟而起事將奈何臣
願陛下以宗社為憂生民為念納汙含垢且求安靜更
俟歲時豐稔窮困稍蘇流亡漸歸民粗安業稅賦不失
倉廩不虛恩信宣布人心固結然後別圖萬全之舉貴
免一跌之失此天下之願也亦臣之志也向又喧傳陛
下決為親征之謀中外益更憂懼心殞膽落陛下雖英
睿天縱必有成算然太平天子與創業之君事體絕異
尤不可慨然輕舉又恐朝廷且作聲勢固無實心事若

如此乃是我以虛聲而邀彼實來也張虛聲者必有踈
畧之虞作實來者必有周密之慮以踈畧之虞而當周
密之計其成敗豈不灼然耶假令入討得志而還此契
丹一種事力自大況又夏國喃廝囉高麗黑水女真達
靼等諸蕃為之黨援其勢必難殄滅使無黠類即此結
成邊患卒無已時大非長轡遠馭之道也臣切謂因橫
使之來且可選人以其疑我者數事開懷喻之云朝廷
凡所為武備乃中國常事非願外興征伐向者用武之

地皆小蕃有過者朝廷須合問罪若吾二大邦通好已
是七十餘年無故安肯輒欲破壞恐是奸人造作妄興
鬪諜或是彼聞我整肅邊事即疑我有所興作我既知
之豈免大為準擬蓋因此互相疑惑養成釁隙遂有今
日爭理朝廷更有可說諸事但盡說之須令釋然無惑
乃一助也橫使始不納即遣報聘者於戎主前具道此
意庶幾一聽必有所益緣彼大藉朝廷歲與方成國計
既有顧藉之心豈無安靜之欲只以疑情未釋遂成倔

強若與開解明白必肯回心向化凡百芥蒂盡可脫畧
苟互相疑忌兩情不通禍患日深必成後悔臣歷觀春
秋洎戰國時諸侯遞相征伐兩兵已合飛矢在上行人
在下辯說解釋遂各交締而退却復盟好者比比皆是
況今豐端漸啓兵尚未合且可多方以理解釋或能有
濟與其用征戰而決勝負萬萬不侔也彼此致疑及禦
戎二事臣並得之羣論非出胸臆是皆目前衆所共知
所共見必然之理非事外別生奇異之策也臣更望陛

下兼求博訪不宜專聽一偏之說恐有迎合聖意及畏
避用事之人不敢盡以實事上奏有誤國家大計臣今
所以及此者切聞去春以久旱陛下特降手詔許人極
陳朝政得失中外歡忭咸謂聖情已大開悟尋聞上章
論列者甚多隨而或遭貶降陛下殊不以手詔召人極
諫為意而優容之反令得罪士大夫自此皆務鉗結忠
蓋之語不敢復出於口臣謂下情不能上達者廼朝政
莫大之患也願陛下深思極慮之早令天下受賜及朝

廷無事不勝大幸此奏出於忽遽又且欲事理明白不敢加飾及援據古事但直書利害而已昔楚相子反謂區區之宋尚有不欺人之臣況中原大國已與北敵結隙今若更不推誠以待之則恐不能解疑釋惑也伏乞聖造特加裁恕

九年六月弼又論蠻獠侵犯乞召諸道以寬民爲務疏曰臣退伏草茅不預人事近者切聞蠢爾蠻獠犯我疆封二廣致災五嶺巖徭雖為手足之患諒煩宵旰之憂

然而命將得人出師有日上稟宸算必成武功臣又切聞淮南累歲尤為荒饑流亡餓殍賑濟難周今驟起數萬之徒間由諸路而往兵馬所到糧草須辦監提守宰唯務供軍府庫倉箱殆難足用既各求於集事恐必至於擾民又有按察之官繼行督責之令上下逼迫公私煎熬人心不寧實可矜惻臣又切聞南方鄉村城郭重疊逋欠官司錢物其數浩瀚若監司州縣又相迫催理仍與此時贍軍所費一併取足則民不堪命無以為生

嘯聚驚騷或難禁戢陛下天賦仁聖累降寬卹之詔其如所在闕用出於無可奈何須至侵漁方能濟集而又官吏各思一時苟免罪責不暇為國家憂及後患而為長久之計也臣又切聞諸處興修水利之類役人甚衆多或至於一二十萬此傷耗民財事亦不細伏願陛下深詔有司並下諸道以寬民為務凡所逋欠可蠲者與蠲放理難蠲放者多分料次且令迤邐輸納及權罷諸般興作令養民力一意專以破賊為急俟嶺南寧息歲

時稍豐然後別上圖議以稱朝廷有為之心固亦未晚也臣杜門謝事祇如聾聵但時得於四方之人傳聞者今錄以上奏苟有妄說惟陛下恕其愚而憐其心以來衆正之路

八年四月判相州韓琦答詔問北邊事宜上疏曰臣伏蒙聖慈特差入內侍省東頭供奉官幹當內東門司裒昱齋賜臣手詔以朝廷通好北敵八十年近歲以來生事彌甚代北之地素有定封而輒開釁端妄來訴理

比敕官吏同加按行雖圖籍甚明而詭辭不伏今橫使復至意在必得朕以祖宗盟好之重固將優容敵情無厭勢恐未已萬一不測何以待之古人大政必詢故老卿夙懷忠義歷相三朝雖爾身在外乃心罔不在王室其所以待遇之要禦脩之方密具以聞臣晚年多病心力耗殫日欲再乞殘骸保此頽暮不意陛下以北敵生事深恩預防記及孤愚曲為詢逮敢不勉竭以塞聖問臣切以契丹與中國抗者蓋一百七十餘年矣自石晉

割地并有漢疆外兼諸戎益自驕大在祖宗朝屢嘗南
牧極肆凶暴當是時豈不欲悉天下之力必與敵角哉
終以愛惜生靈屈就和好疆場有所興作深以張皇引
惹為戒以是七十年間二邊之民各安生業至於老死
不知兵革戰鬪之事至仁大惠不可加也臣觀近年以
來朝廷舉事則似不以大敵為恤敵人素以久強之勢
於我未嘗少下一旦見形生疑必謂我有圖復燕南之
意雖彼主孱而佞佛豈無強梁宗屬與夫謀臣策士引

先發制人之說造此釁端故屢遣使以爭理地界為名
觀我應之之實如何耳所以致敵之疑者臣試陳其大
畧高麗臣屬契丹於朝廷久絕朝貢向浙路遣人招諭
而來且高麗小邦豈能當契丹之盛來與不來國家無
所損益而契丹知之謂朝廷將以圖我此契丹之疑也
秦州古渭之西吐蕃部族散居山野不相君長耕牧自
足未嘗為邊鄙之患向聞強取其地建熙河一路殺其
老少以數萬計所費不貲而河州或云地屬董氐即契

丹墀也既恐闢地未已豈不徃訴而契丹聞之當謂行將及我此又契丹之疑也北邊地近西山勢漸高仰不可為塘泊之處向聞羌官領兵徧植榆柳冀其成長以制敵騎然興於界首無不知者昔慶厯嫚書所謂剗立隄防障塞要路無以異矣然此豈足恃以為固哉但使契丹之疑也河朔義勇民兵置之歲久耳目已熟將校甚整教習亦精而忽團保甲一道紛然義勇舊人十去其七或撥入保甲或放而歸農得增數之虛名破可用

之成法此又徒使契丹之疑也自敵人辨理疆界河朔沿邊與近裏州郡一例差官檢計修築城壘開淘壕塹冀北京役者尤衆敵樓戰棚之類悉加換葺增置防城之具率令脩足逐處兵甲器械累次差官檢視排垛張盤前後非一又諸處朔都作院頒降新樣營謀造作澶州等處朔為戰車此皆衆目所覩諜者易窺且敵人未一動作彼無秋毫之損而我已費財殫力先自困弊此又徒使契丹之疑也近復置立河北三十七將各專軍

政縣不得闕防雄州地控兩邊亦設將屯兵其隨軍衣物有令兵士自辦者有令本營增置者有令官造給付者以至預籍上戶車馬騾驢准脩隨行明作出征次第不可益掩此又深使契丹之疑也夫契丹素為敵國設如此則積疑生事不得不然亦其善自為謀者也今橫使再至初示偃蹇以探朝廷況代北與雄州素有定界若優容而與之恐敵情無厭浸淫不已誠如聖詔所諭固不可與或因其不許敵遂持此以為已直縱未大與

勢必漸擾諸邊卒隳盟好盖有因緣而致此者乃煩明
詔訪以待遇脩禦之要自顧老朽夙夜思之其將何策
上助聖算臣聞言未及而言謂之躁言及之而不言謂
之隱臣昔曾言散青苗錢不便事而言者輒肆厚誣非
陛下之明幾及大戮自此新法之下雖其間有未協人
情者實避嫌疑不敢更有論列今親被詔問事繫國家
安危言及而隱是大不忠罪不容誅矣臣嘗切計始為
陛下謀者必曰自祖宗以來紀綱法度率多因循苟簡

非變之不可也治國之本當先有富强之術聚財積穀
寓兵於民則可以鞭笞四夷盡復唐之故疆然後制作
禮樂以文太平故始散青苗錢使民出利所得之利復
以為本但務多取歲增本錢無有定數又為免役之法
自上等以至下戶皆令次第出錢募人應役從來上戶
輪當衙前重難故其間時有破敗者今上戶一歲出錢
不過三十餘緡安然無事而令下戶素無役者歲歲出
錢此則損下戶而益上戶雖百端補救終無善法又役

錢之內每歲更納寬剩錢以脩他用此謂富國之術也
且農民送納夏秋稅賦一年兩次納不前者始有科校
之刑今納青苗與役錢已是加賦有過限者亦依二稅
法科校則是一戶一歲之中常負六次科校民不勝駭
矣稍遇水旱則逋負官錢流移失業是已著現孰敢言
者又內外置市易務盡籠天下商旅之貨官自取利主
以得利為功圭刀必取小商細民遂無所措手加以新
制日下更改無常州縣官吏茫然不能詳記稍有違者

坐以徒刑雖經赦降去官不得原免監司督責以刺為
明薄法之苛過於告緡故州縣之間官吏惴惴然日苟
一日皆以得罪為幸夫農者國之本也商者能為國致
財者也官吏者助朝廷之教化者也今農者則怨於畎
畝商者則嘆於道路官吏則所在不安其職恐陛下不
能盡知也夫欲攘捍四夷以興太平而先使邦本困搖
衆心離怨振古以來未聞能就此功者也此則陛下始
謀者之大誤也陛下有堯舜之聰明知其所誤能改不

各聖人之大德也。又今好進之人不顧國家之利害，但謂邊事將作，富貴可圖，獻策以干陛下者，必云敵勢已衰，特外示驕慢耳。以陛下神聖文武，若擇將臣領大兵深入敵境，則幽薊之地一舉可復。此又未之思也。今河朔累歲災傷，民力大乏。沿邊次邊州郡芻糧不充，新選將官例皆麤勇，保甲新點未經訓練。若驅重兵頓於堅城之下，糧道不給，敵人四向來援，腹背受敵，欲退不可。其將奈何？太宗時雖曹彬、米信、名德宿將，猶以致歧溝

之敗也臣愚今為陛下計謂宜遣使來報優致禮幣開示大信達以至誠具言朝廷向來興作乃修脩之常與北朝通好之久自古所無豈有他意恐為謀者所誤耳且疆土素定當如舊界請命邊吏退近者侵占之地不可持此造端欲隳祖宗累世之好永篤信約兩絕嫌疑望陛下將契丹所疑之事如將官之類因而罷去以釋敵疑萬一聽伏則可遷延歲月陛下益養民愛力選賢任能疎遠奸諛進用忠鯁使天下悅服邊脩日修塞下

有餘粟帑中有羨財俟敵果有衰亂之形然後一振威武恢復舊疆快忠義不平之心雪祖宗累朝之憤陛下功德赫然如日照耀無窮矣如其不伏決欲背約則河北諸州深溝高壘足以自守敵人果來入寇所在之兵可以伺便驅逐大將持重以全取勝自此彼來我往一勝一負兵家之常不可前料即未知何時復遂休息也至於清野之法則難盡行倉卒之際不可率一境之民比戶將牛馬餼糧盡入城郭蓋至時或有往保生寨者

或有挈家渡河者或有留人看守莊舍者或有就近入居城郭者當使人得自便方保安全固不可按圖先定必令城郭而居雖有嚴令必不從也在祖宗朝屢經北敵之擾鄉民避寇率亦如此願朝廷不須一一處置臣歷事三朝十年輔相宦已極品歸榮故鄉萬事無不足者年將七十宿疹在身每思告老而去庶全始終此緣聖問之及因敢一貢蓋言非嫉善也非求進也用是只以自信今天下之人漸不敢以直言為獻臣實不忍負

累朝眷遇之恩猶覬愚瞽一悟聖心為社稷之盛福惟
陛下加察賜以不疑非獨老臣幸甚天下幸甚

十年監察御史裏行蔡承禧論再征交趾上疏曰臣聞
漢儒之言曰聖人以天下為度傳曰川澤納汙國君含
垢則知天下之治亂無窮若錙銖以較之則道有所不
及故聖人限要荒之俗以不治治之而天下無不治也
伏自交寇之弗率一隅之間兵死於道者相屬丁男之
轉輸而弊於行者相繼靡都內之財以億萬二歲之久

可謂勞矣而所得者廣源數州之地而已夫瘴海窮山
蛟虺霧毒之淵數飛鳶墮於上溫風泊其間殆非人境
雖盡得之顧何補於天下今若討安南之罪則已伏罪
矣雖三苗弗率而七旬班師義亦何以加此然而郭逵
趙鼎尚未罷歸邊兵未還營伍外議喧傳以為李乾德
之降疑不深自引慝朝廷再欲興師不識有此否乎夫
蠻蜚之俗介居荒服之外通譯而能書亦已多矣臣知
朝廷必不計其意之厚薄而與之較也夫所謂限之以

荒服者三代之治蓋詳密矣亦以為不足治何也不欲以遠而勞近以夷而困夏若朝廷以為蠻夷以讎劫為事既已收取其境土而殪其元惡俘其黨類慮其復為異日之患聊用達高之徒以守之使其怯於攻討之勢而不來可也萬一有再舉之策臣願更且詳思熟講假湖廣之人安息數年俟瘡痍平殄然後留意未可輕議以恢陛下納汙含垢之量臣誠識淺言輕干冒天威

元豐八年朝奉郎前知登州軍州事蘇軾登州召還議

水軍狀奏曰右臣竊見登州地近北敵號為極邊敵中山川隱約可見便風一帆奄至城下自國朝以來常屯重兵教習水戰旦暮傳烽以通警急每歲四月遣兵戍馳基島至八月方還以備不虞自景德以後屯兵常不下四五千入除本州諸軍外更於京師南京濟鄆兗單等州差撥兵馬屯駐至慶厯二年知州郭志高為諸處差來兵馬頭項不一軍政不肅擘畫奏乞創置澄海水軍拏手兩指揮并舊有平海兩指揮並用教習水戰以

備北敵為京東一路捍屏蔽知有備故未嘗有警議者見其久安便謂無事近歲始差平海六十人分屯密州信陽板橋濤洛三處去年本路安撫司又更差澄海二百人往萊州一百人往密州屯駐檢會景德三年五月十二日聖旨指揮今後宣命抽差本城兵士往諸處只於威邊等指揮內差撥即不得抽差平海兵士其澄海兵士雖無不許差出指揮蓋緣元初創置本為抵替諸州萊州兵馬豈有却許差諸處之理顯是不合差撥不

惟兵勢分弱以啟戎心而此四指揮更番差出無處學習水戰武藝惰廢有誤緩急伏乞朝廷詳酌明降指揮今後登州平海澄海四指揮兵士並不得差往別州屯駐謹錄奏聞伏候敕旨

神宗時御史中丞蘇轍論渠陽邊事劄子曰臣近論唐義問處置邊事乖方致渠陽蠻寇賊殺將吏乞早黜義問以正邦憲更選練事老將付以疆場經今多日不蒙施行訪聞執政止以臨敵易將兵家所忌為說雖知義

問處置顛錯至覆軍殺將而猶復隱忍不即遣代比雖遣衡規往視然規凡人未曾經練戎事何益於筭徒引歲月坐眎邊人肝腦塗地臣甚惑之謹按義問所為蓋全不曉事留在邊上一日即有一日之害昔趙任廉頗以趙括代之則敗秦任王翦以白起代之則勝蓋臨敵易將顧代者何人耳今執政乃以虛文藉口終欲庇之遠人何辜日被塗炭若非陛下哀矜四方亟命賢將往代則臣恐陷害生靈未有已也兼臣訪聞渠陽諸夷蟠

踞山洞道路險絕中國之兵入踐其地雖跬步不得其便昔郭達知邵州困於陽光僭李浩從章惇自沅州入過界即敗達浩皆西北戰將然並有敗無成者地形不便也今聞朝廷已指揮諸道發兵數目不少然將非其人臣恐既不知戰又不知守老兵費財漸致腹心之患深可慮也今朝廷欲棄渠陽然其中屯戍兵民不下數千義無棄之虜中俾為魚肉要須畧行討定使之畏憚肯出渠陽兵民然後為可臣訪聞湖南北士大夫皆言

羣蠻難以力爭可以智伏欲遣間諜招誘必用土人欲行窺伺攻討必用土兵捨此而欲以中國強兵敵之雖多無益然此可使智者臨事制置難以遥度也臣前者嘗以衆人言謝麟屢經蠻事頗有勞效乞行委任朝廷置而不用蓋必有賢於麟者惟乞速遣以紓邊鄙之患至於義問決無可望幸陛下無疑也臣又聞渠陽諸夷與宜州羣蠻相接宜蠻部族衆多若與渠陽諸夷合謀作過勢益昌熾猝難剪滅亦乞指揮廣西預行招撫雖

不得其用但勿與協力亦不為無益矣取進止

轍又論渠陽邊事劄子曰臣以唐義問處置渠陽蠻事前後乖方致東南第七將王安入界陣亡恐邊患滋長乞速差諳知用兵之人徃代其任又聞義問兵敗之後奏乞棄捐城寨與夷人講和其為暗弱謬妄取笑敵人如此然其事已著伏計朝廷必不復用然外人竊見召還彭孫妄意朝廷欲付湖北邊事兼孫亦以此自任羣議洶洶皆所不曉謹案孫刼竊之餘賊性不改前後委

任欺罔貪盜靡所不為今若委以兵柄深恐塗炭湖北
非州郡所能禁止蓋蠻人背叛不過侵撓邊城若使彭
孫作過腹心郡縣並受其毒前者誤用義問止於敗事
今者若用彭孫凶嶮多端事有不可知者以臣愚見雖
知朝廷必不肯輕用此人然衆所共知不敢默已若待
既用而後獻言實恐於事有損伏乞聖慈早賜施行
起居舍人范純仁乞戒飭邊臣勿弛備狀曰臣近聞夏
國累次遣使赴闕禮意恭順外議皆謂漸可罷兵竊知

西人頓買漢物數目過多似不為頻來之計臣愚慮或恐分畫地界之際復欲阻兵脅盟臣已指揮沿邊諸將寨柵常為意外之備更望朝廷戒敕邊臣不得小有懈慢其向來所增軍馬及創添吏員且與存留候將來畫定地界納到誓書抽減未晚蓋朝廷舉動中外所瞻固宜慎重及臣所奏請邊防利害并舉辟官屬亦望不付有司特降聖旨施行免用常格沮礙臨時闕事萬一落賊姦便上貽宵旰之憂則臣不早陳述之罪萬死難贖

伏望聖慈留神聽納則天下幸甚

純仁同知諫院條列陝西利害疏曰臣前次上殿親奉德音以臣曾任陝西令臣具陝西利害聞奏臣才識淺拙慚無長策上裨聖猷謹具管見條列如左

一唐以涇原帥府在涇州為四鎮北庭邠寧帥府在邠州為靜難軍本朝置逐路總管亦多只在涇邠二州自康定慶厯後來方於慶州置環慶帥府渭州置涇原帥府蓋以邈事之際便於照管然事平

之後饋運增遠民力倍費所以陝西之民久不完
復臣今乞移兩路經畧使只於涇州邠州置府或
遇邊事緊急可令行營就近照管庶減供饋之勞
實於邊事無闕

一邊帥多以粮草責不在已務擁重兵於無事之時
坐耗軍食及妄興軍旅誘致寇讎或縱熟戶邊人
劫掠西界殺害平民為國生事皆非朝廷愛人柔
遠之意臣今乞選擇慶渭延秦四州通判令各兼

本路經畧判官專主本路糧草及覺察城寨使臣
邊人不得誘致寇讎希功生事如能愛惜邊用比
常歲不增供億及將到任至罷任一路糧草比較
如有增羨及本路並無生事之人即委監司保明
其判官並帥臣並與旌賞或枉費供億糧草虧耗
及縱邊人生事者並行責降如此則不惟邊計可
實亦使敵人懷我恩信

一陝西有沙苑等處監牧草地七八千頃自來養馬

別無增息虛占良田今來陝西四塞之地不通漕
運若得彼中自出穀食則屯聚大兵易為供贍今乞
罷陝西監牧將上件地開為營田募民耕種一頃
歲收公私無慮二百碩則歲可得一百五十餘萬
石以助關右兵民之食為利不細其所得芻稈自
可秣馬以助軍計一方今陝西苦於城寨太多及
冗兵冗官為害又朝廷時有試中武藝等人並與
班行殿侍送沿邊指使城寨多則分却兵糧冗官

多則坐耗邊用及班行等各懼替歸本班難得差遣故人人皆思僥倖以為身謀交構邊事無所不至今乞將閒慢城寨冗官冗兵檢會臣前來劄子委帥臣監司減省其試中武藝等人即乞且送陝西內地易得糧草處差使緩急旋行勾抽不惟惜得軍儲兼免妄生邊事

一邊地瘠薄公私難得米穀又山險艱於般運而逐處場務醞酒耗蠹無度每遇邊上兵馬屯聚難得

糧草之際裏外賣酒愈多轉致穀米耗竭和糴不行兼一遇凶歲民即無食官中却輟軍糧救濟今乞將沿邊次邉鄉村酒店課利每月不滿二貫文者並行停閉其州縣城寨酒務亦不得於常年課額外務為增羨庶使不奪民食饑凶之年可減賑貸兼免添起和糴米價大費官錢

一解鹽之法是為邊脩根本近因法壞朝廷雖曾遣張靖體量亦不能深究利病朝廷以未見弊源重

於更制臣恐三二年間粮草亦更虧少今乞檢會
臣前來劄子令轉運司通管公共講求長久之法
庶幾范祥時粮草之數漸可補復

一今之商賈富人車馬器服皆無制度役屬良民豪
奪自奉蓋前世聖王法所先禁今不惟恣其奢僭
耗蠹民用而又於朝廷急難之際一有率斂則羣
聚興怨今既不可暴行禁止可以因其所欲而為
之節文又得財利以資公家之用今乞如秦漢武

功爵之類立為散官及銜校名品使富人入粟於邊然後授之即以其名品高下定為車馬器服僕使屋室之制仍聽贖輕罪如此則國不失權而民皆樂輸不惟可實邊儲亦可漸行內地此亦漢之遺法在聖朝舉行之爾

一邊人好食西界青鹽雖嚴禁所不能止販者多是邊上強人事敗悉遭遠配邊上強人漸少甚非中國之利今乞於沿邊置榷場以茶并雜貨博易青

鹽盡收入官與解鹽同賣仍通入解鹽課額其合用茶乞自朝廷賜與其他雜貨即令解鹽司管認如此則不惟省刑愛人亦可以固我心息邊患

一陝府虢解等州與絳州每年差夫共約二萬人至西京等處採黃河梢木令人夫於山中尋逐採斫多為本處居民於人夫未到之前收採已盡却致人夫貴價於居人處買納及納處邀難所費至厚每一夫計七八貫文貧民有賣產以供夫者今乞

並破官錢收買如官中少錢即許合着夫人戶情
願出錢免夫每夫納錢二貫文與官中合破夫糧
相兼買梢其監買官仍與別立賞格如此則河防
無闕大省民力

監察御史裏行劉執論邊事上言曰臣竊以北敵之為
中國患自詩書已來世常有之方今之勢雖效順悖睦
服威德而利金幣然其驕貪之情常能觀伺中國動靜
一見間隙則造端產謀起事以撼我昔者寶元康定間

國家問西夏之罪而遣使肆嫚有非理之求中外憂恐至倍增歲賂而後已臣愚不足以論事勢然竊有私憂過計以謂今日之故有可以動驕貪之觀伺者臣謹言之昨者綏州用師連兵三歲皆繇議臣失計理曲而無名北敵之於西夏自以為甥舅之國此一事也今高麗遣使朝貢將至闕下高麗自天聖中嘗以事請于朝廷朝廷不從遂附庸北敵自是方貢不入王府者數十年矣既已臣屬於彼而一旦面內中國則恐為彼不能無

疑此二事也臣以謂此二者彼皆足以藉口而為請於朝廷者也伏況大河之北自戊申以來地大震水大溢民大失職離鄉內徙空虛塞下至於今三年而地震未已此何祥也今歲漳河春役財力並竭中路夏旱二麥不登災變因仍人不寧處夫彼既有以為藉口又乘民心皇皇公私疲匱禦備百廢朝廷厭聞邊患之時臣恐敵國見利投隙而區區之信誓豈足以保其心而恃以為安乎彼固不至敢有狂謀假令遣一使持尺書援二

事以請於朝廷其用何辭以杜其問一言入境臣恐勞人以繕器械倍估以儲庾廩更易將帥輕用名器張皇擾攘大勞大費而已爾康定寶元之事蓋可以鑒也又議者籍籍皆謂高麗之至有徼幸希功之人誘而召之者使無此理也不過臣為妄言使誠如議者之論則釁自我始西兵之禍覆車未遠安得不先事而言哉伏乞陛下密詔二府大臣使日夜謀畫以求防微杜變之理而伐其心且河北重地據天下安危之勢願陛下寢食以

為念而無忘北顧常務勞來其人民安輯其田里薄征
斂之數省煩急之令恤其凋憊足其衣食使樂守生涯
而維持其心凡所謂邊備軍政調度之數皆宜因事稍
稍經畫藏其用而隱其跡兵法所謂恃吾有以待之者
惟陛下留神無忽以消連年地震之異夫無事而言其
言若狂而人皆易之有事而言其言雖足以取信而事
已無補臣寧以狂得罪不敢後事而為無益之言以負
陛下耳目之任

翰林學士楊繪論李憲討交趾上疏曰臣伏聞交趾猖狂上負聖化方議討伐雖神謀睿筭已決勝於千里之外而臣不度愚昧敢陳芻蕘出於愛君之切然也伏乞採其狂言臣聞軍志有之善攻者攻其所不守善守者守其所不攻今側聞潭廣易帥修飭守備而南閩泉福之守未聞議焉雖越廣然後抵閩然慮泛海使便風或有出其不意亦未宜忽於守其所不攻也交蠻擾於南方其於出師命將及偏裨之選皆西邊北邊之官素號能

者在行然臣亦慮國家銳意南討而忽於西邊北邊之
備設萬一有乘虛掩不備之寇則其憂又大矣則亦非
所謂守其所不攻之義也臣所謂西北之備者非謂增
兵嚴警張皇其事但陰留驍勇諳練謀慮之將不盡遣
行於南討庶乎有以備西北緩急之用也切見癰疽之
醫未嘗不先用托裏之藥蓋治病於皮膚者先必固護
於心腹此雖醫工之智亦不可謂不知所先後也唯願
陛下察其先後而慮乎皮膚心腹之害焉臣又覩招討

副使李憲年三十五官已為防禦使職已為押班況聞有才今仗宗廟之威靈稟陛下之聖策功其必成臣願陛下儲思於他日成功之後也成功之後賞爵必崇年又未高權又益盛乞陛下處之得其當而已伏惟陛下聰聞明覽其於古今安危之機歷代興亡之轍中貴任權之成敗不假臣縷細而述謹按唐憲宗命吐突承璀為行營招討使於時白居易為翰林學士上疏切諫在其集中臣非不知陛下聖德神功過憲宗遠甚今李

憲又止是副使非如承璫之比然臣遭逢聖恩忝在白
居易之位而又翰林學士三員鄧綰入試院陳繹出知
府本院宿直唯臣一人則臣之榮幸又過於居易臣不
欲使唐憲宗朝獨有翰林學士白居易敢言事而陛下
聖德神功過唐憲宗遠甚乃無翰林學士白居易者是
敢進其區區伏望陛下赦其狂僭之罪而賜之深思遠
慮

神宗詔近臣舉士孫固以施州通判李周聞神宗詔對

謂曰知卿不游權門識今執政乎對曰不識也識司馬
光乎對曰不識也訪禦邊之術曰四邊手足耳若疲中
國以勤遠畧致百姓窮困聚為賊盜懼成腹心之憂神
宗頷之

哲宗即位知慶州范純仁繳進後漢光武詔書狀曰後
漢光武報臧宮等詔曰黃石公記曰柔能制剛弱能制
強柔者德也剛者賊也弱者仁之助也強者怨之歸也
故曰有德之君以所樂樂人無德之君以所樂樂身樂

人者其樂長樂身者不久而亡舍近謀遠者勞而無功
舍遠謀近者逸而有終逸政多忠臣勞政多亂人故曰
務廣地者荒務廣德者強有其有者安貪人有者殘殘
滅之政雖成必敗今國家無善政災變不息百姓驚惶
人不自保而復欲遠事邇外乎孔子曰吾恐季孫之憂
不在顓臾北敵尚強而屯田警備傳聞常多失實誠能
舉天下之半以滅大寇豈非至願苟非其時不如息人
臣伏見夏國差人詣闕多日未見放回近日探到賊

中事宜漸却添屯兵馬必是發情疑阻却欲別生邊患伏望聖慈以陝西生靈之故稍從其欲使復常貢庶幾可以罷兵俾華夏復見太平則陛下好生之德洽於生靈祖宗社稷享萬世之安皆在陛下一言之賜爾臣常讀後漢光武報臧宮馬武詔書良有深戒臣恐陛下欲聞謹錄繳進惟聖心採擇

純仁條對手詔所問邊計狀曰勘會夏國自神宗皇帝升遐後來遣使吊慰祭奠繼以告國母喪進遺物今者

又復遣使入朝謝恩使人比來外示恭順稍可見矣然
戎情狡獪未測其誠心何如耳如向者所得邊地雖建
立城寨亦慮孤僻不易應援棄之則弱國威守之則終
恐戎人在念卿久在西塞深曉邊情當此宜罄嘉謀輔
予憂勞可條具邊計合如何措置向去如何守禦親書
實封聞奏無拘以文者臣奉命皇恐不知所措益臣智
識迂昧計慮不長何足以仰承聖問上副天心雖然臣
蒙被大恩未有補報敢不竭心悉慮強勉以對以成陛

下詢於芻蕘之善臣竊見夏國自朝廷用兵以來近漢之民頗失生業並塞二百餘里不敢耕種其國上下之人皆欲講和又自陛下臨御之初聖政鼎新凡有不便於民者皆為蠲除每詔令一下民間謹呼鼓舞以至印賣傳播謂之快活條貫此事即時聞於敵國又遣上臣寮亦多體朝廷之意不縱侵擾以此夏國必謂朝廷待之異於前時所以遣使入慰探朝廷之意朝廷待其初來之意禮意既厚是以接續宵來以至累次不失恭順

而終未敢復言請地者其意應為前來朝廷拒之太峻
却慮啟口之後更失朝廷之意則和好愈難今聞夏人
又將到闕願選擇押伴臣僚使與推誠語論因而談美
聖政及陛下好生惡殺舍已從人之德彼必有所對答
則敵人之情亦可測見若有願和之意則可令作押伴
臣寮意度說與自用兵以來甚有陷蕃官吏軍民見在
西界宜若夏國盡底納與朝廷聞朝廷待將虜到生口
賜還夏國如有邊上未便之事亦可因而陳請朝廷必

應量度應副彼若云前來已曾請地入貢蒙朝廷不允則可答云前來請地乞貢是梁氏之意宜其朝廷不允今梁氏已死朝廷於國主必無所難彼若無對答則乞委延州趙尚宣布此意其肯還生靈及來請地則可曠然降詔許之亦不須疑其狡獪難測彼將陷蕃官吏軍民押在界上即却將向來所得邊地及城寨内外有居漢人屬戶先次漸令移入近裏並勾集前後虜到夏國生口亦在界上先且立定誓表預約日數兩相交還如

此措置則取舍有名於國威無損其有向來所得邊地
雖是建立城寨其間實有孤僻不易應援供餉之處留
之則戎人必須在今之計若以地却換得陷蕃生靈不
惟無損國體兼和氣充塞天地陛下聖德超越古今為
中國無窮之利矣若趙高諭意不肯換易及換易之後
尚較計別有邀索則朝廷自可絕之嚴戒邊臣堅壁靜
守任其所為如此則我直彼曲我逸彼勞我直彼曲則
人神共怒滅亡可待我逸彼勞則雖久不來庭於王道

無損所有交地之際及宣布之時其間合有意度節次更委趙高條上不得落賊姦計臣倉卒略具大概仰答聖問未能詳盡如蒙召對尚有口奏事件得以粗陳更在陛下擇而行之天下幸甚臣所知邊事只熟知環慶及粗知鄜延其他路分非臣所知臣今所陳乃王體當然為萬世之法非一時之利害也又其宣布意度及換易事節先須只作押伴臣寮及帥臣意度者竊恐戎人萬一於應對之間失禮不遜則於朝廷無損又將來夏

人四日必有答詔便可獎諭其累次遣使恭順及喻以解仇釋怨罷兵息民之意

純仁拜諫議大夫畫夏國疆界三策曰以臣竊見前日
簾前文彥博等諸執政論疆界事宜其時以諸臣奏對
已多臣雖有管見不敢久煩聖聽欲於別日奏陳而臣
今病假在家未能如心竊慮夏人在庭議論日逼謹先
具條列聞奏若以所得夏國地土換易陷蕃生口如此
則便可罷兵息民陛下仁惠之化得以久行堯舜之治

可以速成此上策也又蘭州定西城聞元是西蕃境土
後來方屬夏國已有景德中誓表更不虜掠西蕃彼雖
堅意欲之我亦留之有名徐委邊帥婉順商量雖便未
可罷兵彼應難便猖獗此中策也又若留塞門吳堡義
合而止棄遠處難守二三城寨則朝廷與之不足以示
大恩彼雖得之不足以副其欲如此則兵必不解中外
難安陛下仁惠之政何由復施勝負安危之機邈未可
料所得之地不及秦漢萬分之一廼妨陛下堯舜之政

而且後憂此下策也右臣謹條此三策上進伏望陛下深賜採擇以為天下國家無疆之福臣稍可勉強更當面具奏陳臣未曾見夏人表章如其過有邀求則雖與地不能息兵非臣今來所料俟臣別具陳奏乞且嚴戒邊臣過作守備凡有所闕盡令陳請朝廷當一一應副庶令責有所歸不至悞事惟中策安燾頗與臣合近曾將擬下詔意示臣內有不與中國舊寨一節臣曾簽帖欲其除去然安燾未曾修改應待聖意裁度

純仁為武安軍節度副使乞棄廢寨地與西夏疏曰臣
伏見陛下臨御以來懷柔西戎恩德備至至於冊封賜
地皆出宸斷遂使累年之間戎馬不能犯塞蕃漢生靈
全活無數好生之德格於皇天故使百穀屢登四海豐
樂此帝王之盛事太平之大本也近日傳聞熙河邊臣
分畫地界各惜向來久廢寨地以為要害未欲給賜致
其偃蹇不從以至未能罷兵邊事難了竊恐蓄疑敗謀
事久生變萬一姦人間諜復致猖狂容之則虧損國威

討之則前車未遠連兵不解勞費無期若或饑饉相因
兵民乏食則雖有智謀之臣未易爲計如此則功虧一
簣併棄前恩伏望陛下深留聖念特務遠圖不舍易而
爲難不以小而妨大檢會元約朝旨特賜允從遵孟子
樂天之言稽虞舜舞干之德則天下幸甚臣受恩至重
職與邊臣過計深愛不能緘默惟陛下矜憐曲加采納
又奏司馬光爲陛下陳棄寨之策及後來換易生口并
降賜封冊臣實皆與其議昧者尚多不以爲然至朝廷

力行浮議方息今與西夏君臣體分已定惟有分畫地界所較不多若是去城寨二十里內雖敵人無厭亦可以理開諭必肯依從以臣愚慮但恐邊將貪功生事不樂罷兵將去城寨二十里外聖恩已許給賜或向來用兵之時不曾保據之地指爲要害却欲築城占守則虧朝廷大信悞國家前謀不可不察議者或謂夷狄無厭與之必將更有邀求竊以祖宗朝兵勢國力尚因德明歸順賜以數州元昊稱臣加國主之號蓋欲安民息戰

不以小利玩兵後來彼國果自服從亦何嘗更有干犯而況今日所損利害絕小惟聖明深慮昔樊噲欲以十萬行匈奴中季布指爲面謾武夫邊將之言多若此類上誤先朝不少今可爲鑒

純仁又乞早分畫西夏地界疏曰臣近入劄子爲夏國分畫地界未定恐邊將靳地失信復致用兵所陳利害頗明必已上達天聽近日伏覩樞密院指揮及諸路關報西人頗有點兵侵犯漢境或聞邊將多亦乘此希功

先動恐至秋涼再爲邊患臣是以夙夜過計不敢緘默
臣伏見陛下始與司馬光等議定大計今乃爲邊將貪
鄙之論沮害遠圖前捨四處已成之寨換易生口以示
輕地愛人之德今乃傳聞復留兩堡從來不守之地再
起事端以招纏兵致寇之患昧聖君舞干之化進市道
苟得之謀則其是非輕重不待詳陳蓋今日靳地之邊
臣多昔年生事之黨類朝廷若不早悟必恐復繼前車
將致聖恩無由下通天威不以義動生靈受弊後害難

量臣之區區實在於此日近坤成節夏人進貢在庭若有所請不至乖悖伏望聖慈特賜寬納或令押伴宣諭所有地界早令分畫或邊臣未能宣達朝廷詔旨有所不盡特許奏陳候朝廷相度指揮然後嚴戒邊臣分畫地界並依已行詔旨不得虧失大信別起事端雖云敵人貪婪必亦難生怨叛息民偃革指日可期則天下幸甚臣前來所上劄子更乞檢會看詳特垂收采

純仁又乞戒邊將不得生事疏曰真廟朝與契丹講和

懷撫有道兩國情通小人不敢生事間諜今將百年生
靈安帖自古和戎所未曾有今來西夏雖是小國亦未
可輕況自興兵已來恩信未孚動生疑阻加以邊將慣
得厚賞樂於生事邀功多是先自引惹却稱西人侵犯
構起邊患朝廷不知致使敵人之情無由通達此風不
除難得安靜伏望朝廷常加審察

歷代名臣奏議卷三百三十